

Mensehandel

Mensehandel is die industrie wat wêreldwyd vinniger as enige ander kriminele bedryf groei en is tans ook een van die grootste probleme in Suid-Afrika, veral in die lig van die naderende *Wêreldbekersokkertoernooi*. Waaroor is die bohaai? **Mensehandel** is nie net die uitbuiting van 'gewillige' mense as prostitute nie, maar blatante, doelbewuste ontvoerings waar mense op een of ander manier met valse beloftes uit hulle huise, hulle lande van geboorte weggelok word en waar hulle dan gedwing word om onbetaald of teen 'n baie lae besoldiging te werk. (Paspoorte word bv. van hulle afgeneem). Slagoffers van mensehandel word gebruik in 'n verskeidenheid 'beroepe' soos prostitusie, kinderarbeid, skuldarbeid (afwerk van skuld sonder betaling) of ander vorms van ongeskoolde dwangarbeid. Die handel en verkoop van babas en kinders vir aanneming of om ander redes val ook binne hierdie kategorie van handeldryf.

Mensehandel tydens die *Wêreldbekersokkertoernooi*

Die mees algemene vorm wat mensehandel waarskynlik gedurende die volgende maande in Suid-Afrika gaan aanneem, is prostitusie en die aktiwiteite van "sekswerkers". Jong meisies van selfs 10 -11 jaar en ouer word gebruik as sekswerkers en kan tot 10-20 kliënte per 24 uur hê. Baie van hulle word letterlik gedwing om dwelmslawe te word (sien die film 'Taken') sodat hulle eienaars beheer oor hulle kan hê. Dikwels word jong meisies, en selfs seuns, deur verarmde ouers vir 'n klein bedraggie verkoop. Daar word bereken dat 40 000 sekswerkers gedurende die *Wêreldbekersokkertoernooi* van 2006 in Duitsland, uit ander lande ingevoer is. Ons staan hierdie jaar voor dieselfde reusagtige probleem. Talle jong meisies word deur sindikate as sekswerkers gekontrakteer vir die *Wêreldbekersokkertoernooi* om as sekswerkers te dien. Hoe ongelooflik dit ook mag klink, is daar reeds berigte van 2-4 jarige dogtertjies wat verkoop is vir die komende *Wêreldbekersokkertoernooi*.

Hierdie soort mensehandel vernietig jaarliks miljoene lewens. Een verslaggewer skryf: *Tydens 'n drieweke lange ondersoek in mensehandelsindikate wat naby twee stadions opereer, het ek op 'n winsgewende onderneming in kinderseks afgekom. Kinders word gekoop vir 'n eenmalige bedrag van R350-00 en bring meer as R4500-00 per nag vir hulle eienaars in. "Ek sien regtig uit daarna om meer besigheid gedurende die Wêreldbekersokkertoernooi te doen," het 'n mensehandelaar gesê. Ons het by sy basis gestaan in Port Elizabeth wat uitkyk oor die nuwe Nelson Mandela Stadion. Hy het reeds goeie besigheid gedoen onder die stadion se konstruksiewerkers.*

Ten spyte van meer as 'n dosyn internasionale konvensies wat die afgelope 150 jaar slawerny verban het, is daar vandag meer slawe as op enige tydstip in die mens se geskiedenis. Slawe is mense wat gedwing word om dienste te lewer waarvoor hulle so min betaal word dat hulle net-net kan oorleef, ter wille van die wins vir hulle eienaars wat hulle aanhou met bedrog en geweld. Terwyl Suid-Afrika miljarde belê het om sy infrastruktuur voor te berei vir die half miljoen besoekers wat verwag word, is tienduisende kinders verstregtel in seksuele slawerny en is diegene wat hulle as seksslawe uitbuit vir eie gewin, ook besig om ywerig vir die *Wêreldbekersokkertoernooi* voor te berei.

Kan gebed enigiets verander?

'n Mens voel letterlik siek wanneer jy hierdie goed lees, maar ons kan bid. God kan ingryp - God wil ingryp!

✚ Hier is 'n paar bemoedigende getuienisse. In Athene, Georgia en in die VSA het God ingegryp toe die gemeenskap 24/7 begin bid het. 'n Asiatiese masseersalon wat waarskynlik as front gedien het vir mensehandel, het onverwags toegemaak en 'n Meksikaan is aangekla van handeldryf met jong meisies vanaf Meksiko na Atlanta vir prostitusie. Hy het skuld erken.

✚ In Kansas City, Missouri in die VSA, het 'n helderrooi baksteengebou reg langs die *Kansas City Boiler Room* 'n pornografiewinkel met die naam "Naughty but Nice" gehuisves. 'n Week nadat inwoners begin bid het, is die gebou met die grond gelykgemaak. Vir hulle was die vernietiging van hierdie gebou simbolies van God se hart.

- ✚ Nog 'n verhaal kom van 'n gebedsnetwerk in die VSA. 'n Week nadat gemeenskappe begin bid het, het die nasionale nuusmedia berig dat 52 kinders gered is tydens 'n klopjag op landswye sekshandelsindikate...
- ✚ Terwyl die Reading gemeenskap in Reading, VK, 24/7 gebid het, is 'n man van die omgewing gearresteer wat verdink is van mensehandel vir seksuele uitbuiting en die bedryf van prostitusie vir winsbejag. Hoofopskrifte in die koerante het gelui: "Arrestasies volg op ondersoek in sekshandel". God het hulle gebede beantwoord.
- ✚ Verlede jaar het die polisie in een van die townships in Suid-Afrika berig van 'n oplewing in prostitusie, gesinsgeweld en ander tipes seksverwante geweld teenoor jong meisies en vrouens (in die spesifieke township). Onder leiding van 'n plaaslike biskop het ongeveer 2 000 kinders 2 ure per dag vir 5 dae lank gebid. En aan die begin van die volgende week het die polisie berig dat daar 'n 70% afname in aangemelde gevalle was!

Hoe bid ek?

- ✚ Bid dat meer mense sal begin bid en waar moontlik, sal uitreik na mense wat betrokke is by mensehandel, die sekswerkers sowel as die sindikaatleiers.
- ✚ Bid vir gespesialiseerde wetgewing wat aan die polisie wetlike reg sal gee om teen hierdie soort geweld teenoor vroue en jong seuns op te tree.
- ✚ Bid dat mensehandel oopgevelek sal word en dat die bewuswording hiervan die publiek se aandag sal trek.
- ✚ Bid dat mense 'n gebedsbanier sal ophou teen hierdie probleem in ons land.
- ✚ Bid dat die kerk na slagoffers van mensehandel sal uitreik met sensitiwiteit en groot deernis.
- ✚ Bid vir gemeenskapsgebaseerde projekte wat die probleem van mensehandel kan aanspreek in aktiewe gebiede – veral in die omgewing van die *Wêreldbekersokkerstadions*.
- ✚ Inligtingsmateriaal is beskikbaar vir plaaslike gemeentes; groot kerkprojekte, saam met lede van die taakmag wat dit fasiliteer, vind tans plaas in Oos-Europa, Indië, Kanada en Australië. Bid vir 'n groter bewuswording van kerke hieroor en vir die verspreiding van hierdie materiaal.
- ✚ Om mensehandel oor internasionale grense effektief aan te spreek, vereis samewerking tussen lande. Bid dat strukture operig sal word wat hierdie misdaad kan beveg.
- ✚ Kom ons bid volgens **Klaagliedere 2:18-19**: *Roep tot die Here, Sion, laat jou trane in strome vloei, dag en nag, moet jou nie rus gun nie, moenie dat jou oë verligting kry nie. Staan dwarsdeur die nag op en roep, stort voor die Here jou hart uit soos water, strek jou hande uit, en bid om die lewe van jou kinders, hulle wat van honger beswyk op die hoeke van die strate.*

Hoe kan jy betrokke raak en help?

Begin bid, saam met ander waar moontlik. Maak seker dat jy weet wat in ons land aangaan voordat jy jou kinders inskryf by organisasies soos model- of au pair-agentskappe, ens. Raak betrokke by projekte by jou kerk en gee 'n deel van jou tyd en kennis vir die wat in nood verkeer. Besoek die volgende webwerwe vir meer inligting: www.justiceacts.org/www.anexcdw.org.za / www.straatwerk.org.za / www.avoicethevoiceless.co.za

(Gevolgtrekkings en gebedsriglyne in hierdie artikel weerspieël die standpunt van die skrywer en nie noodwendig dié van die bronne geraadpleeg nie.

Bronne: (Webwerf: <http://www.reuters.com/article/pressRelease/idUS265569+29-Oct-2009+PRN20091029> en http://www.latimes.com/news/nationworld/nation/la-na-child-prostitution27-2009oct27_0,2692854.story asook <http://www.readingchronicle.co.uk/news/roundup/articles/2009/10/29/42564-arrests-follow-sex-trafficking-probe/>).